

大智度論卷七-佛微笑

問曰：笑從口生，或時眼笑，今云何言「一切身笑」？

答曰：佛，世界中尊，得自在，能令一切身如口、如眼故，皆能笑復次，一切毛孔皆開，故名為笑；由口笑歡喜故，一切毛孔皆開。

問曰：佛至尊重，何以故笑？

答曰：如大地，不以無事及小因緣而動；佛亦如是，若無事及小因緣則不笑，今大因緣故一切身笑。云何為大？佛欲說摩訶般若波羅蜜，無央數眾生當續佛種，是為大因緣。

復次，佛言：「我前世曾作小虫、惡人，漸漸集諸善本，得大智慧；今自致作佛，神力無量最上最大。一切眾生亦可得爾，云何空受勤苦而墮小處？」以是故笑。